



王昌齡集卷上

五言古詩

鄭縣陶太公館中贈馮六元二

儒有輕王侯脫畧當世舉本家藍溪下非爲漁弋
故無何困躬耕且欲馳水路幽居與君近出谷同
所務昨日辭石門五年變秋露雲龍未相感干謁
亦已屢子爲黃綬羈余忝蓬山顧京門望西岳百
里見郊樹飛雨祠上來靄然關中暮驅車鄭城宿
秉燭論徃素山月出華陰開此河渚霧清光比故
人豁達展心晤馮公尚戢翼元子仍跼步拂衣易

爲高論迹難有趣張范善終始吾等豈不慕罷酒
當涼風屈伸備冥數

香積寺禮拜萬迴平等二聖僧塔

真無御北來昔有乘花歸如彼雙塔內孰能知是
非愚也駭蒼生聖哉爲帝師當爲時世出不由天
地資萬迴至此方平等性無違今我一禮心億劫
同不移肅肅松栢下諸天來有時

變行路難

向晚橫吹悲風動馬嘶合前驅引旗節千里陣雲
匝單于下陰山沙礫空颯颯封侯取一戰豈復念

閨閣

齋心

女蘿覆石壁溪水幽濛朧紫葛蔓黃花娟娟寒露
中朝飲花上露夜臥松下風雲英化爲水光采與
我同日月蕩精魂寥寥天府空

秋山寄陳讜言

巖間寒事早衆山木已黃北風何蕭蕭茲夕露爲
霜感激未能寐中宵時慨慷黃蟲初悲鳴玄鳥去
我梁獨臥時易晚離群情更傷思君苦不及鴻鴈
今南翔

過華陰

雲起大華山雲山牙明滅東峯始含景了了見松
雪羈人感幽棲宵映轉竒絕欣然忘所疲永望吟
不輟信宿百餘里出關玩新月何意乍溟溟遇物
遂遷別人生屢如此何以肆愉悅

聽彈風入松闕贈楊府

商風入我絃夜竹深有露絃悲與林寂清景不可
度寥落幽居心颺颺青松樹松風吹草白溪水寒
日暮聲意去復還九變待一顧空山多雨雪獨立
君始悟

宿裴氏山莊

蒼蒼竹林暮吾亦知所投靜坐山齋月清谿聞遠
流西峰下微雨向晚白雲收遂解塵中組終南春
可遊

同從弟銷南齋翫月憶山陰崔少府

高臥南齋時開帷月初吐清輝滔水木演漾在窓
戶萋萋幾盈虛澄澄變今古美人清江畔是夜越
吟苦千里其如何微風吹蘭杜

秋興

日暮西北堂涼風洗修木著書在南窓門館常肅

肅苔草延古意視聽轉幽獨或問余所營刈黍就
寒谷

太湖秋夕

水宿煙雨寒洞庭霜落微月明移去去夜靜魂夢
歸暗覺海風度蕭蕭聞鴈飛

裴六書堂

閒堂閉空陰竹木但清響窓下長嘯客區中無遺
想經綸精微言兼濟當獨往

代扶風主人荅

殺氣凝不流風悲月彩寒浮埃起四遠遊子迷不

歡依然宿扶風沽酒聊自寬寸心亦未理長鋏誰
能彈主人就我飲對我還慨然便泣數行淚因歌
行路難十五役邊城三迴討樓蘭連年不解甲積
日無所食將軍降匈奴國使沒桑乾去時三十萬
獨自還長安不信沙場苦君看刀箭瘢鄉親悉零
落塚墓亦摧殘仰攀青松枝慟絕傷心肝禽獸悲
不去路傍誰忍看幸逢休明代寰宇靜波瀾老馬
思伏櫪長鳴力已殫少年與運會何事發悲端天
子初封禪賢良刷羽翰三邊悉如此否泰亦須觀

段宥廳孤桐

鳳凰所宿處月映孤桐寒槁葉零落盡空柯蒼翠
殘虛心誰能見直影非無端響發調尚苦清商勞
一彈

巴陵劉處士東齋作

劉生隱岳陽心遠洞庭水偃帆入山郭一宿楚雲
裏竹映秋館深月寒江風起煙波桂陽接日夕數
千里嫋嫋清夜猿孤舟坐如此湘中有來鴈雨雪
候音旨

趙十四兄見訪

客來舒長簾開閣延清

但有無絃琴共君盡樽

中晚來常讀易頃者獨還嵩世事何須道黃精且
養蒙嵇康殊寡識張翰獨知終忽憶鱸魚膾扁舟
往江東

九江口作

漭漭江勢濶雨開潯陽秋驛門是高岸望盡黃蘆
洲水與五溪合心期萬里遊明時無棄才謫去隨
孤舟鷺鳥立寒木大夫佩吳鉤何當報君恩却繫
風霜頭

獨遊

林臥情每閑獨遊景常晏時從灞陵下隨釣往南

澗手攜雙鯉魚目送千里鴈悟彼非有適知此罹
憂患放之清冷泉因得省踈慢永懷青岑客迴首
白雲間超然無遺事豈繫名與宦

江中聞笛

橫笛怨江月扁舟何處尋聲長楚山外曲繞胡關
深相去萬餘里遙傳此夜心寥寥浦溆寒響盡唯
幽林不知誰家子復奏邯鄲音水客背擁棹空霜
遂盈襟羸馬望北走遷人悲越吟何當邊草白旌
節隴城陰

塞下曲三首

蟬鳴桑樹間八月蕭關道出塞入塞寒處處黃蘆
草從來并幽客皆共塵沙老莫作游俠兒矜誇紫
騶好

飲馬度秋水水寒風似刀平沙日未沒黯黯見臨
洮昔日長城戰咸言意氣高黃塵是今古白骨亂
蓬蒿

秋風夜渡河吹却鴈門桑遙見胡地獵韉馬宿嚴
霜五道分兵去孤軍百戰場功多翻下獄士卒但
心傷

少年行

西陵俠少年送客短長亭青槐夾兩路白馬如流
星聞道羽書急單于寇井陘氣高輕赴難誰願燕
山銘

雜興

握中銅七首粉剉楚山鐵義士頻報讐殺人不會
缺可悲燕丹事終被狼虎滅一舉無兩全荆軻遂
爲血誠知匹夫勇何取萬人傑無道吞諸侯坐見
九州裂

送任五之桂林

楚客醉孤舟越水將引棹山爲兩鄉別月帶千里
貌羈譴同繒綸僻幽聞虎豹林林寒色在苦節知
所效

山中別龐十

幽娟松篠徑月出寒蟬鳴散髮臥其下誰知孤隱
情吟時白雲合釣處玄潭清瓊樹方杳靄鳳兮保
其貞

留別伊闕張少府郭都尉

遷客就一醉主人空金壘江湖青山底欲去仍徘徊
郭侯未相識策馬伊川來把手相勸勉不應老
塵埃孟陽逢山舊仙館留清才日晚勸取別風長

雲逐開幸隨板輿遠負譴何憂哉唯有仗忠信音
書報雲雷

詠史

荷畚至洛陽胡馬屯北門天下裂其土豺狼滿中
原明夷方濟世歛翼黃埃昏披雲見龍顏始蒙國
士恩位重謀亦深所舉無遺奔長策寄臨終東南
未可吞賢智苟有時貧賤何所論唯然嵩山老而
後知我言

宴南亭

寒江映村林亭上納鮮潔楚客共間飲靜坐金管
闕酣意日入山暝來雲歸穴城樓空杳靄猿鳥備
清切物狀如絲綸上心爲予決訪君東溪事早晚
樵路絕

放歌行

南渡洛陽津四望十二樓明堂坐天子月朔朝諸
侯清樂動千門皇風被九州慶雲從東來泱泱抱
日流昇平貴論道文墨將何求有詔徵草澤微誠
獻謀猷冠冕如星羅拜揖曹與周望塵非君事入
賦且遲留幸蒙國士識因脫負薪裘今者放歌行
以慰梁甫愁但營數斗祿奉養每豐羞若得金音

遂飛雲亦可求

送十二兵曹

縣職如長纓終日檢我身平明趨郡府不得展故人故人念江湖富貴如埃塵迹在戎府掾心遊天台春獨立浦邊鶴白雲長相親南風忽至吳分散還入秦寒夜天光白海靜月色真對坐論歲暮絃歌起無因平生馳驅分非謂杯酒仁出處兩不合忠貞何由申看君孤舟去且欲歌垂綸

何九於客舍集

客有住桂楊亦如巢林鳥壘觴且終宴功業曾未了山月空霽時江明高樓曉門前泊舟檝行次入松篠此意投贈君滄波空裏裏

從軍行

向夕臨大荒翊風軫歸慮平沙萬餘里飛鳥宿何處虜騎獵長原翩翩傍河去邊聲搖白草海氣生黃霧百戰苦風塵十年履霜露雖投定遠筆未坐將軍樹早知行路難悔不理章句

越女

越女作桂舟還將桂爲楫湖上水渺漫清江不可涉摘取芙蓉花莫摘芙蓉葉將歸問夫壻顏色何

如妾

長歌行

曠野饒悲風颼颼多蒿草繫馬倚白楊誰知我懷
抱所是同抱者相逢盡衰老况登漢家陵南望長
安道下有枯樹根上有鼯鼠窠高皇子孫盡千載
無人過寶玉頻發掘精靈其柰何人生須達命有
酒且長歌

潞府客亭寄崔鳳童

蕭條郡城閉旅館空寒煙秋月對愁客人鐘搖暮
天新知偶相訪斗酒情依然一宿阻長會清風徒

滿川

灞上閒居

鴻都有歸客偃臥滋陽村軒冕無枉顧清川照我
門空林網夕陽寒鳥赴荒園廓落時得意懷哉莫
與言庭前有孤鶴欲啄常翻翻爲我銜素書弔彼
顏與原二君旣不朽所以慰其魂

洛陽尉劉晏與府掾諸公茶集天宮寺岸

道上人房

良友呼我宿月明懸天宮道安風塵外灑掃青林
中削去府縣理豁然神機空自從三湘還始得今

五言詩集卷五
夕同舊居太行北遠宦滄溟東各有四方事白雲處處通

同府縣諸公送綦母潛李頎至白馬寺

鞍馬上東門徘徊入孤舟賢豪相追送即棹千里流赤岸落日在空波微煙收薄官亡機枯醉來復淹留月明見古寺林外登高樓南風開長廓夏夜如涼秋水照吳縣西歸夢中遊

就道士問周易參同契

仙人騎白鹿髮短耳何長時余採葛蒲忽見嵩之陽稽首求丹經乃出懷中方披讀了不悟歸家問嵇康嗟余無道骨發我入太行

諸官遊招隱寺

山館人已空青蘿換風雨自從永明世月向龍宮吐鑿井長幽泉白雲今如古應真坐松栢錫杖掛窓戶口云七十餘能救諸有苦回指崑樹花如聞道場鼓金色身壞滅真如性無主僚友同一心清光遣誰取

酬鴻臚裴主簿雨後北樓見贈

暮霞照新晴歸雲猶相逐有懷晨昏暇想見登眺目問禮侍彤襜題詩訪茅屋高樓多今古陳事滿

陵谷地久微子封臺餘孝王築徘徊顧霄漢豁達
俯川陸遠水對秋城長天向喬木公門何清靜列
戟森已肅不歎携手稀常思着鞭速終當拂羽翰
輕舉隨鴻鵠

風涼源上作

陰岑宿雲歸煙霧濕松栢風淒日初曉下嶺望川
澤遠山無晦明秋水千里白佳氣盤未央聖人在
凝碧關門阻天下信是帝王宅海內方晏然廟堂
有竒策時貞守全運罷去遊說客予忝蘭臺人幽
尋免貽責

悲哉行

勿聽白頭吟人間易憂怨若非滄浪子安得從所
願北上太行山臨風闕吹雲數千里倏忽還
膚寸觀其微滅時精意莫能論百年不容息是處
生草蔓始悟海上人辭君永飛遁

琴

孤桐秘虛鳴朴素傳幽真髣髴絃指外遂見初古
人意遠風雪苦時來江山春高宴未終曲誰能辨
經綸

送東林簾上人歸廬山

石溪流已亂苔徑人漸微日暮東林下山僧還獨
歸昔爲廬峰意况與遠公違道性深寂寞世情多
是非會尋名山去豈復望清輝

留別武陵袁丞

皇恩暫遷謫待罪逢知己從此武陵溪孤舟二千
里桃花遺古岸金澗流春水誰識馬將軍忠貞抱
生死

觀江淮名勝圖

刻意雲吟山尤知隱淪妙遠公何爲者再詣臨海
嶠而我高其風披圖得遺照援毫無逃境遂展千

里眺淡掃荆門壁明標赤城燒青葱林間嶺隱見
淮海徼但指香爐頂無聞白猿嘯沙門旣云滅獨
往豈殊調感對懷拂衣胡寧事漁釣安期始遺舄
千古謝榮耀投迹庶可齊滄浪有孤棹

緱氏尉沈興宋置酒南溪留贈

林色與溪古深篁引幽翠山樽在漁舟棹月情已
醉始窮清源口壑絕人境異春泉滴空崖萌草拆
陰地乂之風榛寂遠聞樵聲至海鴈時獨飛永然
滄洲意古時青冥客滅迹淪一尉王子躊躇心豈
其紛埃事緱岑信所尅濟北余乃遂齊物可任今

息肩理猶未卷舒形性表脫畧賢哲議仲月期角
巾飯僧嵩陽寺

七言古詩

奉贈張荊州

祝融之峯紫雲銜翠如何其雪嶺崑邑西有路緣
石壁我欲從之卧穹嶽魚有心兮脫網罟江無人
兮鳴楓杉王君飛鳥仍未去蘇耽宅中意遙緘

箜篌引

盧溪郡南夜泊舟夜聞兩岸羌戎謳其時月黑猿
啾啾微雨沾衣令人愁有一遷客登高樓不言不

寐彈箜篌作蘇門葉葉秋風沙颯颯青塚頭將
軍鐵騎汗血流深入匈奴戰未休黃旗一點兵馬
收亂殺胡人積如丘瘡病驅來役邊州仍披漠北
羔羊裘顏色飢枯掩面羞眼匡淚滴深兩眸思還
本鄉食糞牛欲語不得指咽喉或有強壯能咿嘍
意說被他邊將讐五世屬藩漢主留碧毛氊障河
曲遊橐駝五萬部落稠勅賜飛鳳金兜鍪爲君百
戰如過籌靜掃陰山無鳥投家藏鐵券持承優黃
金百斤不稱求九族分離作楚囚深溪寂寞絃苦
幽草木悲感聲颼颼僕本東山爲國憂明光殿前

論九疇麓讀兵書盡冥搜爲君掌上施權謀洞曉
山川無與儔紫宸詔發遠懷柔搖筆飛霜如奪鈎
鬼神不得知其由憐愛蒼生比蚍蜉朔河屯兵須
漸抽盡遣降來拜御溝便令海內休戈矛何用班
超定遠侯史臣書之得已不

烏栖曲

白馬逐朱車黃昏入狹邪柳樹烏爭宿未得歸上
屋東房少婦壻從軍每聽烏啼知夜分

城傍曲

秋風鳴桑條草白狐兔驕邯鄲飲來酒未消城北
原平掣皂鵬射殺空營兩騰虎迴身却月佩弓鞘

王昌齡集卷上

王昌齡集卷下

五言律詩

客廣陵

樓頭廣陵近九月在南徐秋色明海縣寒煙生里
間夜帆歸楚客昨日度江書為問易名叟垂綸不
見魚

送李濯遊江東

清洛日夜漲微風引孤舟離腸便千里遠夢生江
樓楚國橙橘暗吳門煙雨愁東南具今古歸望山
雲收

靜法師東齋

築山在人境遂得真隱情
春盡草木變雨來池館
清琴書全雅道視聽已無生
閉戶脫三界白雲自
虛盈

寒食即事

晉陽寒食地風俗舊來傳
雨滅龍蛇火春生鴻鴈
天泣多流水漲歌發舞雲旋
西見之推廟空爲人
所憐

素上人影塔

物化同枯木希夷明月珠
本來生滅盡何者是虛
無一坐看如故千齡獨向隅
至人非別有方外不
應殊

沙苑南渡頭

秋霧連雲白歸心浦溆懸
津人空守纜村館復臨
川蓬隔蒼茫雨波通演漾
田孤舟未得濟入夢在
何年

和振上人秋夜懷士會

白露傷草木山風吹夜寒
遙林夢親友高興發雲
端郭外秋聲急城邊月色殘
瑤琴多遠思更爲客
中彈

駕出長安

聖德超千古皇風扇九圍天回萬象出駕動六龍
飛淑氣來黃道祥雲覆紫微太平多扈從文物有
光輝

駕幸河東

晉水千廬合汾橋萬國從開唐天業盛入沛聖恩
濃下輦迴三象題碑任六龍睿明懸日月千歲此
時逢

胡笳曲

城南虜已合一夜幾重圍自有金笳引能露出塞
衣聽臨關月苦清入海風微三奏高樓曉胡人掩
淚歸

五言排律

夏月花萼樓酺宴應制

土德三元正堯心一國同汾陰備冬禮長樂應和
風賜慶垂天澤流歡舊渚宮樓臺生海上簫鼓出
天中霧曉筵初接宵長曲未終雨隨行幕合月影
舞羅空玉陛分朝列文章發聖聰愚臣忝書賦歌
詠頌絲桐

七言律詩

九日登高

青山遠近帶皇州
霽景重陽上北樓
雨歇亭皋仙菊潤
霜飛天苑御梨秋
茱萸插鬢花宜壽
翡翠橫釵舞作愁
謾說陶潛籬下醉
何曾得見此風流

萬歲樓

江上巍巍萬歲樓
不知經歷幾千秋
年年喜見山長在
日日悲看水獨流
猿狖何曾離暮嶺
鷓鴣空自泛寒洲
誰堪登望雲煙裏
向晚茫茫發旅愁

五言絕句

朝來曲

月吳鳴珂動花
連繡戶春盤龍
玉臺鏡唯待畫
眉人

答武陵田太守

仗劍行千里微軀敢一言
曾為大梁客不負信陵恩

送胡大

荆門不堪別况乃瀟湘秋
何處遙望君江邊明月樓

題灞池二首

腰鎌欲何之東園刈秋韭
世事不復論悲歌和樵

叟
開門望長川薄暮見漁者借問白頭翁垂綸幾年也

擊磬老人

雙峯褐衣久一磬白眉長誰識野人意從看春草芳

題僧房

棕櫚花滿院苔蘚入閑房彼此名言絕空中聞異香

送郭司倉

映門淮水綠留騎主人心明月隨良掾春潮夜夜深

送李十五

怨別秦楚深江中秋雲起天長杳無隔月影在寒水

送張四

楓林已愁暮楚水復堪悲別後冷山月清猿無斷時

武陵田太守席送司馬盧溪

諸侯分楚郡飲餞五溪春山水清暉遠俱憐一逐

臣

從軍行

大將軍出戰白日暗榆關
三面黃金甲單于破膽
還

送譚八之桂林

客心仍在楚江館
復臨湘別意猿鳥外
天寒桂水長

送劉十五之郡

平明江霧寒客馬江上發
扁舟事洛陽
宵宵含楚月

七言絕句

長信秋詞五首

金井梧桐秋葉黃
珠簾不捲夜來霜
熏籠玉枕無顏色
臥聽南宮清漏長

高殿秋砧響夜闌
霜深猶憶御衣寒
銀燈青瑣裁縫歇
還向金城明主看

奉帚平明金殿開
且將團扇共徘徊
玉顏不及寒鴉色
猶帶昭陽日影來

真成薄命久尋思
夢見君王覺後疑
火照西宮知夜飲
分明復道春時恩

長信宮中秋月明昭陽殿下擣衣聲白露堂中細
草迹紅羅帳裏不勝情

出塞行

白花垣上望京師黃河水流無盡時窮秋曠野行
人絕馬首東來知是誰

青樓曲二首

白馬金鞍從武皇旌旗十萬宿長楊樓頭小婦鳴
箏坐遙見飛塵入建章
馳道楊花滿御溝紅粧綬縮上青樓金章紫綬千
餘騎夫婿朝回初拜侯

出塞

秦時明月漢時關萬里長征人未還但使盧城飛
將在不教胡馬度陰山

寄穆侍御出幽州

一從恩譴度瀟湘塞北江南萬里長莫道薊門書
信少鴈飛猶得到衡陽

送魏二

醉別江樓橘柚香江風引雨入船涼憶君遙在瀟
湘月愁聽清猿夢裏長

別李浦之京

故園今在灞陵西江畔逢君醉不迷小弟鄰莊尚
漁獵一封書寄數行啼

武陵龍興觀黃道士房問易因題

齋心問易太陽宮八卦真形一氣中仙老言余鶴
飛去玉清壇上雨濛濛

西宮秋怨

芙蓉不及美人粧水殿風來珠翠香卻恨含啼掩
秋扇空懸明月待君王

春宮曲

昨夜風前露井桃未央前殿月輪高平陽歌舞新

承寵簾外春寒賜錦袍

李倉曹宅夜飲

霜天留飲故情歡銀燭金爐夜不寒欲問吳江別
來意青山明月夢中看

浣紗女

錢塘江畔是誰家江上女兒全勝花吳王在時不
得出今日公然來浣紗

閨怨

閨中少婦不曾愁春日凝粧上翠樓忽見陌頭楊
柳色悔教夫婿覓封侯

送狄宗亨

秋在水清山暮蟬洛陽樹色鳴皋煙送君歸去愁
不盡又惜空度涼風天

蕭駙馬宅花燭

青鸞飛入合歡宮紫鳳銜花出禁中可憐今夜千
門裏銀漢星回一道通

西宮春怨

西宮夜靜百花香欲卷珠簾春恨長斜抱雲和深
見月朧朧樹色隱昭陽

青樓怨

香幃風動花入樓高調鳴箏緩夜愁腸斷關山不
解說依依殘月下簾鉤

採蓮曲二首

吳姬越艷楚王妃爭弄蓮花水濕衣來時浦口花
迎入採罷江頭月送歸

荷葉羅裙一色裁芙蓉向臉兩邊開亂入池中看
不見聞歌始覺有人來

題朱鍊師山房

叩齒焚香出世塵齋壇鳴磬步虛人百花仙醞能
留客一飯胡麻度幾春

聽流人水調子

孤舟微月對風林分付鳴箏與客心嶺色千重萬
重雨斷絃收與淚痕深

宴春源

源向春城春幾重江明深翠引諸峰與君醉失松
溪路山館寥寥傳暝鐘

龍標野宴

沅溪夏晚足涼風春酒相携就竹叢莫道絃歌愁
遠謫青山明月不曾空

觀獵

角鷹初下秋草稀鐵驄拋鞚去如飛少年獵得平
原兔馬後橫捎意氣歸

梁苑

梁園秋竹古時煙城外風悲欲暮天萬乘旌旗何
處在平臺賓客有誰憐

送薛大赴安陸

津頭雲雨暗湘山遷客離憂楚地顏遙送扁舟安
陸郡天邊何處穆陵關

甘泉歌

乘輿執玉已登壇細草霑衣春殿寒昨夜雲生拜

初月萬年甘露水晶盤

芙蓉樓送辛漸二首

寒雨連江夜入吳
平明送客楚山孤
洛陽親友如相問
一片冰心在玉壺

丹陽城南秋海陰
丹陽城北楚雲深
高樓送客不能醉
寂寂寒江明月心

重別李評事

莫道秋江離別難
舟船明日是長安
吳姬緩舞留君醉
隨意青楓白露寒

別陶副使歸南海

南越歸人夢海樓
廣陵新月海亭秋
寶刀留贈長相憶
當取戈船萬戶侯

送人歸江夏

寒江綠水楚雲深
莫道離憂遷遠心
曉夕雙帆歸鄂渚
愁將孤月夢中尋

送李五

玉盃金壘傾送君
江西日入起黃雲
扁舟乘月暫來去
誰道滄浪吳楚分

送十五舅

深林秋水近日空
歸棹演漾清陰中
夕浦離觴意

何已草根寒露悲鳴蟲

留別郭八

長亭駐馬未能前
井邑蒼茫含暮煙
醉別何須更惆悵
回頭不語便垂鞭

送竇七

秋江月色傍林秋
波上熒熒望一舟
鄂渚輕帆須早發
江邊明月爲君留

巴陵送李十二

搖拽巴陵洲渚分
清江傳語便風聞
山長不見秋城色
日暮蒹葭空水雲

送裴圖南

黃河渡頭歸問津
離家幾日茱萸新
漫道閨中飛破鏡
猶看陌上別行人

留別司馬太守

王念辰陽太守孫
遠謫沅溪何可論
黃鶴青雲當一舉
明珠吐着報君恩

盧溪別人

武陵溪口駐扁舟
溪水隨君向北流
行到荆門上三峽
莫將孤月對猿愁

送程六

冬夜傷離在五溪青魚雪落鱸橙壅武岡前路看
斜月片片舟中雲向西

送朱越

遠別舟中蔣山暮君行舉首燕城路薊門秋月隱
黃雲期向金陵醉江樹

別辛漸

別館蕭條風雨寒扁舟月色渡江看酒酣不識關
西道却望春江雲尚殘

送柴侍郎

沅水通波接武岡送君不覺有離傷青山一道同

雲雨明月何曾是兩鄉

西江寄越弟

南浦逢君嶺外還沅溪更遠洞庭山堯時恩澤如
春雨夢裏相逢同入關

從軍行五首

烽火城西百尺樓黃昏獨坐海風秋更吹羌笛關
山月無那金閨萬里愁

琵琶起舞換新聲總是關山離別情撩亂邊愁聽
不盡高高秋月照長城

關城榆葉早踈黃日暮雲沙古戰場表請迴軍掩

塵骨莫教兵士哭龍荒
青海長雲暗雪山孤城遙望玉門關
黃沙百戰穿金甲不破樓蘭竟不還
大漠風塵日色昏紅旗半捲出轅門
前軍夜戰洮河北已報生擒吐谷渾

殿前曲二首

貴人粧梳殿前催香風吹入殿後來
仗引笙歌大宛馬白蓮花發照池臺
胡殿笙歌西殿頭梨園弟子和涼州
新聲一段高樓月聖主千秋樂未休

黃鍊師院三首

松間白髮黃尊師童子燒香禹步時
欲訪桃源入溪路忽聞雞犬使人疑
先賢盛說桃源花塵忝何堪武陵郡
聞道秦時避地人至今不與人通問
山觀空虛清淨門從官役吏擾塵喧
暫因問俗到真境便欲投誠依道源

送萬大歸長沙

桂陽秋水長沙縣楚竹離聲爲君變
青山隱隱孤舟微白鶴雙飛忽相見

送吳十九往沅陵

沅江流水到辰陽溪口逢君驛路長
遠謫誰知望雷雨明年春水共還鄉

別皇甫五

淑浦潭陽隔楚山離樽不用起愁顏
明祠靈響期昭應天澤俱從此路還

送崔參軍往龍溪

龍溪只在龍標上秋月孤山兩相向
譴謫離心是丈夫鴻恩共待春江漲

送鄭判官

東楚吳山驛樹微輶車銜命奉恩輝
英睿攜出新豐酒半道遙看驄馬歸

送姚司法歸吳

吳椽留觴楚郡心洞庭秋雨海門陰
但令意遠扁舟送不道滄江百丈深

寄陶副使

聞道將軍破海門如何遠謫渡湘沅
春來明主封西岳自有還君紫綬恩

至南陵答皇甫嶽

與君同病復漂淪昨夜宣城別故人
明主恩波非

歲久長江還共五溪濱

王昌齡集卷下終

崔顥集卷上

五言古詩

贈王威古

三十羽林將出身常事邊春風吹淺草獵騎何翩翩
插羽兩相顧鳴弓新上弦射麋入深谷飲馬投荒泉
馬上共傾酒野中聊割鮮相看未及飲雜虜寇幽燕
烽火去不息胡山高際天長驅救東北轉戰解城全
報國行赴難古來皆共然

古遊俠呈中軍諸將

少年負膽氣好勇復知機伏劍出門去孤城逢合

圍殺人遼水上走馬漁陽歸錯落金鎖甲蒙茸貂
鼠衣還家行且獵弓矢速如飛地迥鷹犬疾草深
狐兔肥腰間帶兩綬轉眄生光輝顧謂今日戰何
如隨建威

贈輕車

悠悠遠行歸經春涉長道幽冀桑始青洛陽蠶欲
老憶昨戎馬地別時心草草烽火從此來邊城閉
常早平生少相遇未得展懷抱今日杯酒間見君
交情好

關西作

燕郊芳歲晚殘雪凍邊城四月青草合遼陽春水
生胡人正牧馬漢將日徵兵露重寶刀濕沙虛金
鼓鳴寒衣着已盡春服與誰成寄語洛陽使爲傳
邊塞情

贈懷一上人

法師東南秀世實豪家子削髮十二年誦經峨眉
裏自此照群蒙卓然爲道雄觀生盡入妄悟有皆
成空淨體無衆染苦心歸妙宗一朝勅書至召入
承明宮說法金殿裏焚香清禁中傳燈遍都邑杖
錫遊王公天子揖妙道群僚趨下風我法本無着

時來出林壑因心得化成隨病皆與藥上啓黃屋
心下除蒼生縛一從入君門說法無朝昏帝作轉
輪玉師爲持戒尊軒風灑甘露佛雨生慈根但有
滅度理而生開濟恩復聞江海曲好殺成風俗帝
曰我上人爲除膾腥欲是日發西秦東南至蘄春
風將衡桂接地與吳楚隣舊少清信士寔多漁獵
人一聞吾師至捨網江湖濱作禮懺前惡潔誠期
後因因成日旣久事濟身不守更出淮楚間復來
荆河口荆河馬卿岑茲地近道林入講鳥常狎坐
禪獸不侵都非緣未盡曾是教所任故我一來事
永承微妙音竹房見衣鉢松宇清身心早梅業至
淺晚成計可尋善哉遠公義清淨如黃金

結定襄郡獄

我在河東時使往定襄里定襄諸小兒諍訟紛城
市長老莫敢言太守不能理謗書盈几案文墨相
填委牽引肆中翁追呼田家子我來折此獄五聽
辨疑似小大必以情未嘗施鞭箠是時三月暮遍
野農桑起里巷鳴春鳩田園引流水此鄉多雜俗
戎夏殊音旨顧問邊塞人勞情曷云已

雜詩

可憐青銅鏡掛在白玉堂玉堂有美人嬌弄明月
光羅袖拂金鵲綵屏點紅粧粧罷含情坐春風桃
李香

遊天竺寺

晨登天竺山山殿朝陽曉澗泉爭噴薄江岫相縈
繞直上孤頂高平看衆峰小南州十二月地暖冰
雪少青翠滿寒山藤蘿覆冬沼花龕瀑布側青壁
石林杪鳴鐘集人天施飯聚猿鳥洗意歸清淨澄
心悟空了始知世上人萬物一何擾

入若耶溪

輕舟去何疾已到雲林境起生魚鳥間動搖山水
影巖中響自荅溪裏言彌靜事事令人幽停橈向
餘景

七言古詩

川上女

川上女晚粧鮮日落青渚試輕楫汀長花滿正迴
船暮來浪起風轉緊自言此去橫塘近綠江無伴
夜獨行獨行心緒愁無盡

代閨人答輕薄少年

妾家近隔鳳凰池粉壁紗牕楊柳垂本期漢代金

吾壻誤嫁長安游俠兒兒家夫壻多輕薄借客探
丸重然諾平明挾彈入新豐日晚揮鞭出長樂青
絲白馬冶遊園能使行人駐馬看自矜陌上繁華
盛不念閨中花鳥闌花間陌上春將晚走馬鬪鷄
猶未返三時出望無消息一去那知行近遠桃李
花開覆井欄朱樓落日捲簾看愁來欲奏相思曲
抱得秦箏不忍彈

長安道

長安甲第高入雲誰家居住霍將軍日晚朝迴擁
賓從路傍拜揖何紛紛莫言炙手手可熱須臾火
盡灰亦滅莫言貧賤即可欺人生富貴自有時一
朝天子賜顏色世事悠悠應始知

渭城少年行

洛陽三月梨花飛秦地行人春憶歸揚鞭走馬城
南陌朝逢驛使秦川客驛使前日發章臺傳道長
安春早來棠梨宮中燕初至葡萄館裏花正開念
此使人歸更早三月便達長安道長安道上春可
憐搖風蕩日曲江邊萬戶樓臺臨渭水五陵花柳
滿秦川

秦川寒食盛繁華遊子春來不見家鬪鷄下社塵

初合走馬章臺日半斜章臺帝城稱貴里青樓日
晚歌鐘起貴里豪家白馬驕五陵年少不相饒雙
雙挾彈來金市兩兩鳴鞭上渭橋渭城壚頭酒新
熟金鞍白馬誰家宿可憐錦瑟箏琵琶玉臺新酒就
君家小婦來不解羞嬌歌一曲楊柳花

行路難

君不見建章宮中金明枝萬萬長條拂地垂二月
三月花如霰九重幽深君不見豔彩朝含四寶宮
香風吹入朝雲殿漢家宮女春未闌愛此芳香朝
暮看來看去看心不忘攀折將安鏡臺上雙雙素
手剪不成兩兩紅粧笑相向建章昨夜起春風一
花飛落長信宮長信麗人見花泣憶此珍樹何嗟
及我昔初在昭陽時朝攀暮折登玉墀只言歲歲
長相對不寤今朝遙相思

鴈門胡人歌

高山代郡東接燕鴈門胡人家近邊解放胡鷹逐
塞鳥能將代馬獵秋田山頭野火寒多燒霧裏孤
峯濕作煙聞道遼西無鬪戰時時醉向酒家眠

七夕

長安城中月如練家家此夜持針線仙裙玉珮空

自知天上人間不相見長信深陰夜轉幽瑤階金閣數螢流班姬此夕愁無限河漢三更看斗牛

江畔老人愁

江南年少十八九乘舟欲渡青溪口青溪口邊一老翁鬢眉皓白已衰朽自言家代仕梁陳垂朱拖紫三十人兩朝出將復入相五世疊鼓乘朱輪父兄三葉皆尚主子女四代爲妃嬪南山賜田接御苑北官甲第連紫宸直言榮華未休歇不覺山崩海將竭兵戈亂入建康城煙火連燒未央闕衣冠士子陷鋒刃良將名臣盡埋沒山川改易失市朝

衢路縱橫填白骨老人此時尚少年脫身走得投海邊罷兵歲餘未敢出去鄉三載方來旋蓬蒿忘却五城宅草木不識青溪田雖然得歸到鄉土零丁貧賤長辛苦採樵屢入歷陽山川稻常過新林浦少年欲知老人歲豈知今年一百五君今少壯我已衰我昔少年君不睹人生貴賤各有時莫見羸老相輕欺感君相問爲君說說罷不覺令人悲

盧姬篇

盧姬小小魏王家綠鬢紅唇桃李花魏王綺樓十二重水精簾箔繡芙蓉白玉欄千金作柱樓上朝

朝學歌舞前堂後堂羅袖人南窓北牖花發春翠
幌珠簾鬪絲管一彈一奏雲欲斷君王日晚下朝
歸鳴環佩玉生光輝人生今日得嬌貴誰道盧姬
身細微

孟門行

黃雀銜黃花翩翩傍簷隙本擬報君恩如何反彈
射金罍美酒滿座春平原愛才多衆賓滿堂盡是
忠義士何意得有讒諛人諛言翻覆那可道能令
君心不自保北園新栽桃李枝根株未固何轉移
成陰結實君自取若問傍人那得知

邯鄲宮人怨

邯鄲陌上三月春暮行逢見一婦人自言鄉里本
燕趙少小隨家西入秦母兄憐愛無儔侶五歲名
爲阿嬌女七歲丰茸好顏色八歲黠惠能言語十
三兄弟教詩書十五青樓學歌舞我家青樓臨道
傍紗牕綺幔暗聞香日暮生歌駐君馬春日粧梳
妾斷腸不用城南使君壻本求三十侍中郎何知
漢帝好容色玉輦携登歸建章建章宮殿不知數
萬戶千門深且長百堵塗楹接青瑣九華閣道連
洞房水精簾箔雲母扇琉璃窓牖玳瑁牀歲歲年

崔顥集卷上
年奉懽宴嬌貴榮華誰不羨恩情莫比陳皇后寵
愛全勝趙飛燕瑤房侍寢世莫知金屋更衣人不
見誰言一朝復一日君王棄世市朝變宮車出葬
茂陵田賤妾獨留長信殿一朝太子升至尊宮中
人事如掌翻同時侍女見讒毀後來新人莫敢言
兄弟印綬皆被奪昔年賞賜不復存一旦放歸舊
鄉里乘車垂淚還入門父母愍我曾富貴嫁與西
舍金王孫念此翻覆復何道百年盛衰誰能保憶
昨尚如春日花悲今已作秋時草少年去去莫停
鞭人生萬事由上天非我今日獨如此古今歇薄
皆共然

崔顥集卷下

五言律詩

晚入汴水

昨晚南行楚今朝北汴河客愁能幾日鄉路漸無
多晴景搖津樹春風起棹歌長淮亦已盡寧復畏
潮波

發錦沙村

北上途未半南行歲已闌孤舟下建德江水入新
安海近山常雨溪深地早寒行行泊不可須及子
陵灘

題潼關樓

客行逢雨霽歇馬上津樓山勢雄三輔關門扼九州川從陝路去河遶華陰流向晚登臨處風煙萬里愁

題沈隱侯八詠樓

梁日東陽守爲樓望越中綠窓明月在青史古人空江靜聞山狃川長數塞鴻登臨白雲晚流恨此遺風

送單于裴都護赴西河

征馬去翩翩城秋月正圓單于莫近塞都護欲臨邊漢驛通煙火胡沙泛井泉功成須獻捷未必去經年

贈梁州張都督

聞君爲漢將虜騎不南侵出塞清沙漠還家拜羽林風霜臣節苦歲月主恩深爲語西河使知余報國心

王家少婦

十五嫁王昌盈盈入畫堂自矜年最少復倚壻爲郎舞愛前溪淥歌憐子夜長閒來鬪百草度日不成粧

岐王席觀妓

二月春來半王家日正長
柳垂金屋暖花發玉樓
香拂匣先臨鏡調笙更炙簧
還將歌舞態只擬奉
君王

長門怨

君王寵初歇棄妾長門宮
紫殿青苔滿高樓明月
空夜愁生枕席春意罷
簾櫳泣盡無人問容華落
鏡中

上巳

巳日帝城春傾都袂
禊辰停車湏傍水奏樂要驚

塵弱柳障行騎浮橋擁看人
猶言日尚早更向九
龍津

寄盧象

客從巴南度傳爾泝行舟
是日風波霽高唐雨半
收青山滿蜀道綠水向
荊州不作書相問誰能慰
別愁

五言排律

舟行入剡

鳴棹下東陽回舟入剡鄉
青山行不盡綠水去何
長地氣秋仍濕江風晚
漸涼山梅猶作雨溪橋未

知霜謝客文逾盛林公未可忘多慙越中好流恨
閱時芳

奉和許給事夜直簡諸公

掖黃樞近東曹紫禁連池因才子拜人用省郎
直千門靜河明萬象懸建章宵漏急閭闔曉
有寵列貂蟬位恩深侍從年九重初起草五夜
即成篇顧已無官次循涯但自憐遠陪蘭渚作空
此仰神僊

相逢行

妾年初二八家住洛橋頭玉戶臨馳道朱門近御

溝使君何暇問夫壻大長秋女弟新承寵諸兄近
拜侯春生百子殿花發五城樓出入千門裏年年
樂未休

澄水如鑑

聖賢將立喻上善貯情深潔白依全德澄清有片
心澆浮知不撓濫濁固難侵方寸懸高鑑生涯詎
陸沉對泉能自誠如鏡靜相臨廉慎傳家政流芳
合古今

七言律詩

行經華陰

岩堯大華俯咸京天外三峯削不成武帝祠前雲
欲散仙人掌上雨初晴河山北枕秦關險驛樹西
連漢時平借問路傍名利客無如此處學長生

黃鶴樓

昔人已乘白雲去此地空餘黃鶴樓黃鶴一去不
復返白雲千載空悠悠晴川歷歷漢陽樹芳草萋
萋鸚鵡洲日暮鄉關何處是煙波江上使人愁

五言絕句

長干曲四首

君家何處住妾住在橫塘停船暫借問或恐是同

鄉

家臨九江水來去九江側同是長干人生小不相
識

下渚多風浪蓮舟漸覺稀那能不相待獨自送潮
歸

三江湖水急五湖風浪涌由來花性輕莫畏蓮舟
重

七言絕句

維揚送友還蘇州

長安南下幾程途得到邗溝弔綠蕪渚畔鱸魚舟

崔顯集卷下
上鈞羨君歸老向東吳

崔顯集卷下終

